

1 PITÖR

Warage Codoi o Ayeet Pitör

1 ¹ Aneeta Pitör o keen toonnyai o Yesu Kiristo. Kayeedekun warage nico igeet ol o eñerawun Jooi o abaaku loocowe o kazi Pantas ki Galatiya ki Kapadociya ki Asiya been Biziniya. ² Eñerawun baale laadun Jooi ween baatinai igeet genyize onin, ma utuguwun niini igeet obonta vönize onin giye o uzuutu niiga zöwz o Yesu Kiristo, ma otoonycewu itiliza biyete ogin. Abon bai deteni o Joowo kibeen ganön abil ñaatunooñ jurun.

Ñaan anyet Jooi kaal o titiny dook

³ Abon zin naaga kanyek zany Jook ween baati Manyi onai Yesu Kiristo. Eeci niini bonate onin anyet ageet roget o colai giye o itinawi Yesu Kiristo daayiza. Gi o zin inoko karewi naaga nönön zinzeetine ogaac dook o neen. ⁴ Inoko zin karewa naaga mayuwenet o adikir o iyanek Jooi ol ogin. Iyanekun niini igeet kaal nicoko tammu tadena ñaao alañ ameni karabön adak tödöwa. ⁵ Ma abekun niini igeet dayize onin giye o atuyu niiga nönön zee ma aku iiteni o rogzeno iitene ci aforneke löcci e.

⁶ Mazin kaale nicoko, mayo nuun anyak kaal ci meelik acinanun igeet o, abon atalninu niiga labak. ⁷ Ma piryakzet nici acina tuwen unooñ mā atuwenu didi kiyo göön acina ol warki gooya o. Bar zin tuwen adöi öwöt kujuk warki o adicai. Zin iitene ci abadaan Yesu Kiristo e ñaan ajowanu niiga zany kibeen titinyon ñaatin. ⁸ Mayo nuun ñaan icinit nönön o, utuweec niiga nönön, ma areezu nönön. Atalto zin giye nico öwöt ele. ⁹ Anyaku talniin o, eeci anyun Jooi igeet roget tuwente unooñ.

¹⁰ Rogzen zin baal aröñ nyakananeta o Joowo e neen nici, ma uduka baale niigi deten ci ka kiiya kanyozeyun igeet noko. ¹¹ Aröñ waanice niigi kagaac Kiristo niini ñeneen. Ma aröñ buk waanice niigi kagaac iiten o ka kiiya kipirai niini, ma vurtu ka kiiyayet titinyonti onine ageet, eeci waanice itoona Kiristo Vöniz o Joowo ka kiiya keyelezak nönög gi nico kidicilim. ¹² Ma zöwz ci baal ayelzak Jooi nyakananet niceke o, alañ een zöwz ci akati eleeti cigeec, bar zöwz ci ka kitiritun igeet. Ma ivita iziiktu niiga inoko kaviyak nicoko toonnyawe o uwak kaviyak o abon dayize o Vöniz o Joowo itoonnyai tamma. Mayo nuun een toonnyak o tammo ele aröñ buk kagaac zöwz nico.

Aroonnyet Jooi kabaayit baayiz ci abon ñume onin

¹³ Abon zin anyeku niiga baabanok ugooc keeltek göl o Joowo. Iziti vilile. Anycek zinzeeti kereec deten o ka kiiya kanyozeyun igeet iitene ci abadaan Yesu Kiristo e. ¹⁴ Ma giye o izitu niiga ol ci Joowo, má ñaan bodo agoonu kaal o ger baal göön agoonu inaan agaac nönön e. ¹⁵ Utuguz zin kaal ci abon, eeci Jooi o anjeranun igeet agöön göön kaal ci abon. ¹⁶ Agayu niiga azi Jooi waragewe onin ne, “Abon abonanu, eeci buk naana kabona.”

¹⁷ Abon zin anjolinu nönön ñinti ñaan rak abaaku loota ñina o dook, eeci niini Jook ween baatunooñ neen. Nönön neen o apak ol dook kotobto kaale ugeec agöön. ¹⁸ Eeci agayu niiga iya atalawun Jooi igeet baayize unooñ ger baal göön agamnyu keerane o jijitugoo e. Alañ zin atalanun niini igeet warkine karabön een zurtenene. ¹⁹ Bar öögawun niini igeet biyete o Kiristo titiny kujuk warki. Biyeta ogine atobö ki biye ci nyöön ci azeeto abon agano ñaati eene todoyoi. ²⁰ Eñera baale Jooi nönön laadun inaan löcci keteenyai e. Ma itoonayun niini nönön iinyaye nicoko ka kiiya koroguzun igeet. ²¹ Zin ñaaten Yesu utuyu niiga Jook baal inaan nönön daayiza, ma anyek diñdijon e. Makacin tuwen unooñ been rewinet unooñ ibila Joowa.

²² Inoko zin giye o uzuutu niiga zöwz ween didi, otoonyce igeet eleeti ugoocok kitiliza. Abon zin areezonu niiga dook zinzeetine ugoocok dook. ²³ Eeci itiryawu bodo niiga tiryawu ci colai iziti döc ci baatunooñ o alañ adaai. Itiryawu gole o zöwz onin rogeto abil nökö been neen. ²⁴ Azi warage o Joowo ne, “Eel ol ci deer o dook kiyo arte o, ma rogeti cineen o atobö ki arte o göön ma aku tagizi, araabjai bodo, ma adaai o. ²⁵ Bar zin zöwz o Joowo abil niini keleeme nökö been neen.” Zöwz zin baal uuwawonekun igeet e neen nici.

2 ¹ Abon uunnu kaal o ger dook. Má avolonnyu. Má abuuu eleeti. Má amadiku ol. Má amomozu ol. ² Abon zin iroktanu niiga eleeti ugoocok zooze o Joowo kiyo dölya o miliny iroktai iirane jurun o, ka zin odoyit tuwenta, ³ eeci atartu niiga bonat o Manyi.

⁴ Ivitak zin niiga Manyi o rogeto. Nönön neen o atobö ki be o titiny baal abor ol, ma anyek kizi gi ci labak e. Bar zin Jooi eñera nönön, eeci niini titiny öwöt ñaatin. ⁵ Eelnu zin buk niiga rogete unooñ kiyo biyen o. Abon zin eenycai ceez o Joowo vönjizo ñaatunooñ. Eñerawun Jooi igeeta iziti gabara cigin titiny ka anycek niiga nönön kaal o abon zinzeetinu o agamnyai ñaatin gole o Yesu Kiristo. ⁶ Kayabzei naana Yesu be ci titiny o, eeci azi waragewi o Joowo ne, “Inoko kareya kutur onan kazi Ziyön be ci titiny öwöt ci kanjera naana. Ma eeti ci ano nönön, ajowa didi niini kaal o katerkedei naana ol.” ⁷ Ma be nici titiny öwöt ñaatunooñ igeet o atuyu nönön. Maje bar ole o alañ atuwe atobö niigi ki ol o eenycinto abor be o titiny kujuk gönögi. ⁸ Ma bodo Yesu buk atobö niini ki be o titiny adir ol kuruyit looc kiyo aduyai waragewe o Joowo o. Adiri o, eeci abor niigi zöwz o Joowo. Nicini zin zöwz cineen doon, ma anyak niigi eleeti payiin ci ger Joowa.

⁹ Bar zin niiga izitu bor ci eñerawun Jooi, ma eeginu gabara ci Joowo taabinto. Ma eeginu ol cigin abon. Anjerawun niini igeet ka uduktak ol dook linñon onin atet ol biye. Utuwawun niini igeet muura ka ivitak vooritin onin adikir öwöt. ¹⁰ Baale laadun alañ eeginu ol ci Joowo, bar zin inoko o izitu ol cigin. Baale laadun ñaan ojokta deten o Joowo, bar zin inoko ojoktawu deten onin.

¹¹ Lanotigan, inoko niiga eelnu loota ñina kiyo kernowa o. Kilalekun zin igeet ka edeya eleeti onene o reecanzetu o göön uulal zinzeeti ugooc tup. ¹² Utuguz niiga kaal ci abon ole o alañ atuwe, ka ma nuun te anjomotun niigi igeet gerze, acin bodo niigi kaal o abon agoonu niiga, ka katanaazö ñeere niigi Jook iitene ci atuwen e.

Aroonnyet Jooi ageet kotoñole alaat o abalet

¹³ Mazin giye o areezu niiga Manyi, otoñole alaat o loocu ñina. Otoñole alaan o Rom adikir kujuk gönögi dook. ¹⁴ Buk otoñole alaat o göön itoon niini köot kapaktek gerzitin ol o göön agöön kaal o ger, ma adizkek ol o abon. ¹⁵ Gi o zin aröñ Jooi neen ce. Aroonnyun Jooi igeet utuguz kaal ci abon öla ka mā anyak ol ci tarbal azoozun igeet gerze, ka keyelizyai tarbalzet cineen o.

¹⁶ Abaayit zin labak, bar zin má anyeku baayiz labak cunoon o koyuñ gole ci oñecu. Bar abaayit niiga iziti ol ci Joowo didi.

¹⁷ Ititinyit ol dook. Ereezit gonogu o atuwe. Otñolte Jook. Ititinyit alaan o Rom adikir.

Arɔɔŋ Jooi gabara kotoŋole alaat ugeec

¹⁸ Ma niiga ol o eeginu gabara abon aŋolinu alaat ugooc. Má bar adiññanuu alaat o abon doon, bar idiññanuu buk alaat o ger avaraciz giye o aŋolinu niiga Kiristo. ¹⁹ Mā amezu kaal ci agiduñ ol igeet giye o aŋolin zinzeeti ugooc Jook, amayukuñ koca Jooi igeet. ²⁰ Buk mā amezu piryakzet ŋaati agoonu kaal ci abon, amayukuñ koca Jooi igeet. Mazi bar agiduñ ol igeet giye ci agoonu kaal ci ger, aganonu koca niiga ki giden labak. ²¹ Awuyuñ Jooi o ka ivita ipirta gole onin, eeci buk Kiristo iya ipira ŋaatunoon. Eyeleyuñ zin niini igeet gɔl nico ka buk niiga oneec. ²² Ŋaan kutugu niini oñec, ma akom eet ci iziik nɔɔnɔ ŋaati aduwan vɔlɔŋ. ²³ Baale gɔɔn ma amomoz ol nɔɔnɔ, alaŋ niini acaca. Iitene baal apirnanɛ niini e ŋaan kotoborek eet oma nɔŋ. Bar waanice anyek niini ele Jook o apak kaal dook juruñ. ²⁴ Nɔɔnɔ zin neen o aarawet ageet oñe ogaac alye onin keete ween talakec ka calaŋ kagɔɔn bodo oñe, bar ka kabaayit naaga baayiz ci abon. Nɔɔnɔ neen o uruguzuñ igeet tobene ogin. ²⁵ Eeci baale eelnu niiga kiyo aza o akoloni o, bar zin inoko abadayu eet o towawiinto ka kiiya kotowawuñ niini igeet ka kuzuutuñ.

Arɔɔŋ Jooi ŋaai kotoŋole eet ugeec

3 ¹ Zin buk gole nico niiga ŋaai abon aŋolinu eet ugooc, ka mayo nuun te ogen ŋaatineñ alaŋ atuwe, ka anyaahtak niiga nɔɔgɔ Jook kaale o abon acin agoonu niiga kɔkɔm zɔɔz ci appe aduwaku. ² Mā agoonu nɔkɔ, atuwe koca niigi giye o acinuñ igeet agoonu kaal ci abon iziti didi ŋaai o arocai, ma aŋolinu Jook.

³ Má aricanu linat o eleeti bitaalu gole ci abuwenu, karabɔŋ een kalbene ci acabeku, karabɔŋ een rumanene ci aborceku. ⁴ Bar abon ayelizai linati unoon abil kodot zinzeeti ugooc bonata ki jayinta been zinzeeti laliza. Ma linati nici adiññiñ ɔɔɔt ele ŋume o Joowo. ⁵ Eeci baale ŋaai o abon baal atu Jook e anyek eleeti ugeec kitiliza gole nico, ma aŋole niigi eet ugeec. ⁶ Baale ŋaa o kazi Sara agɔɔn nɔkɔ. Aŋole niini eet onin kazi Ibrayim, ma awo nɔɔnɔ kizi manyi cin. Zin buk mā agoonu niiga kaal ci abon kɔkɔm ŋoliin, eeltu koca buk niiga kiyo baale Sara e.

Arɔɔŋ Jooi eet kabaayit ki ŋaai ugeec rɛɛzɔnta

⁷ Zin buk niiga eeta abon abaaku ki ŋaai cugoocok juruñ rɛɛzɔnta. Abon agayu niiga ŋaai kaal ci akom dɔyiz. Zin giye nico abon buk agoonu nɔɔgɔ juruñ, eeci ŋiñeere avɔ ajowanu niiga ki nɔɔgɔ buk roget o abil been neen Joowa. Utuguz nɔkɔ ka ŋaryiin unoon kiziiye.

Arɔɔŋ Jooi ol ogin dook kabaayito ganɔnta

⁸ Inoko zin bodo kanekuñ ne, Igeet dook abon adowinuñ zɔɔz cunoon zinzeetine. Abon awucnekuñ igeet ol ogen. Ereeztɔ niiga dook kiyo dɔl o ŋaao o. Ititinyɔ niiga dook. ⁹ Mā agoonekuñ eeti igeet gi ci ger, má acacanu. Buk mā adomnyuñ eeti oman igeet, má acacanu. Bar abaliyek niiga nɔɔnɔ otok ci abon mayuwenta, eeci agayu niiga mayuwenet laadun gi baal aterkedekuñ Jooi igeet ka kanyuñ iiten baal awuyuñ igeet e neen. ¹⁰ Kiyo azi warage o Joowo ne, “Ma eeti ci arɔɔŋ roget ci abon, ma arɔɔŋ kabaak yaak iinya dook nɔkɔ, abon agam niini aat onin calaŋ azɔɔz kaal ci ger, ma alaŋ aduwa vɔlɔŋ. ¹¹ Abon adewa niini ele kaale o ger, ma agɔɔn kaal ci abon. Ma abon abaak niini kibeen ol dook ganɔnta tup nɔkɔ. ¹² Eeci Jooi agelem ol o agɔɔn kaal o abon, ma azii ŋaryiin uneen. Maje bar ol o gɔɔn agɔɔn kaal o ger, abor Jooi nɔɔgɔ ɔɔɔt.”

¹³ Mā agoonu niiga kaal ci abon, agoonekuñ zin koca bodo igeet gi ci ger ŋene? ¹⁴ Bar zin mayo nuun apirnanuñ ol ŋaati abaaku baayiz ci abon, amayukuñ koca Jooi igeet. Zin giye nico má aŋolinu ol ci deer o been neen, ma anyeku zinzeeti kitiranyit. ¹⁵ Bar idiññanuu Manyitinaai Kiristo zinzeetine ugoocok dook anycek nɔɔnɔ kizi Manyi unoon neen. Iziti zin vilile ka ma ajinuñ eeti oman igeet keŋ ci tuwen cunoon o, ka oobtek niiga nɔɔnɔ juruñ zinzeetine ci alal. ¹⁶ Oobtek nɔɔnɔ zinzeetine ci abon atibez. Anycek zin niiga zinzeeti cugoocok o kobonta ka ol o gɔɔn azoosuñ igeet gerze ŋaaten Yesu Kiristo ka kanyayit alyaan kaale cigeec gɔɔn azoosuñ niigi igeet gerze gaga o. ¹⁷ Eeci mate aroŋnyuñ Jooi igeet ipirta, abon apirnanu ŋaati agoonu kaal ci abon, alaŋ een ŋaati agoonu kaal ci ger. ¹⁸ Eeci Kiristo iya ipira ŋaatunoon. Ma adaak niini lak codoi tɔr nɔkɔ oñene ugooc. Niini eet ci abon, ma iya adaak ŋaaten igeet ol o izitu niiga ol ci Joowo. Uruwe niini baale kadaak, ma bar bodo itinjawu Jooi vɔñiz onin daayiza. ¹⁹ Ma ook niini vɔñize onin, ma ako uuwayek zɔɔz o Joowo minin o acabje loowe o minin tɔdɔwai eecitɔ. ²⁰ Ma mininɔ nici ol baal abor Jook iinyaye baal eenyane eeti o kazi Nowa kavool o liilu appe e neen. Ma waanice arɛ Jooi nɔɔgɔ zinize ci alal ka waan kabadit niigi mony oñene ugeec, bar ŋaan kutuyɔ. Otodot zin waanice tawani ol dook, ma arogi ol ceen turge nɔkɔ. ²¹ Ma tawani nica riritɔn ci ayelza oonyen ci inoko aruguzuñ igeet noko. Ma oonyen nici alaŋ ka kaara oñe, bar olla terkediin ci kanyeke naaga eleeti Jook ka kanyet niini ageet zinzeeti ci abon. Korogit zin naaga giye o itinjawu Yesu Kiristo daayiza.

²² Yesu neen o ook tamma, ma inoko o aavi niini aziite o Joowo azo. Ma abal toonnyak o tammu been alaat o tammu tadenu dook.

Arɔɔŋ Jooi ol ogin kilinliŋtozek nɔɔnɔ zinzeetine dook

4 ¹ Mazin giye o iya ipirai Kiristo alye onin ŋaatinai, abon buk igeet adonnuñ zinzeeti gidenta nɔkɔ, eeci eeti ci ojowa giden ci alyo, alaŋ bodo agɔɔn oñe. ² Abon zin akananu inoko ele ŋinti ŋaan rak abaaku loota o, abaayit baayiz o abon arɔɔŋ Jooi calaŋ een o arɔɔŋ eeti o deer. ³ Ejeztu ri niiga kaal o ger baal gɔɔn agoonu kiyo ol o alaŋ atuwe e. Baale gɔɔn agoonu kaal ci ger ɔɔɔt kiyo waanzet, ki baayinet o, ma buk gɔɔn baale avɔ ooginu ki ŋaai ci ol oogi iitene o gɔɔn avɔ adiññanuu niiga joowane ugooc ger adilyai. ⁴ Inoko zin ol o alaŋ atuwe ibiirit nɔɔgɔ ooti giye ci alaŋaan agoonu niiga ki nɔɔgɔ kaal ugeec ger gɔɔn agɔɔn o. Gi ci zin gɔɔn amomozuñ niigi igeet o neen. ⁵ Bar zin ŋiñeere ŋaan avɔ aduwak niigi kaal ugeec ger agɔɔn Jook o areyi ka kapak ol dook o adaai kibeen o arogi buk. ⁶ Gi zin baal ako uuwayeke Yesu zɔɔz o Joowo buk ol o adaayito e neen. Apayewun zin Jooi eleeti ugeec daayiz kiyo buk ol dook o. Maje vɔñizowa ugeec ka korogit kiyo buk arogi Jooi o.

⁷ Izi zin inoko looc dican ajɔn. Egenyit zin! Agamit eleeti! Iziti vilile ŋaryiinta! ⁸ Gi ci zin adiññiñ ɔɔɔt kujuk gɔnɔgi dook ce. Abon areezonu niiga dook ɔɔɔt, eeci rɛɛzɔnet abuñ oñe ci meel ger. ⁹ Atala gɔɔn gonogu ceezine ugooc kɔkɔm cocobɔn. ¹⁰ Anyek Jooi eet co gɔɔn ŋaatunoon linliñɔn cin. Abon zin niiga dook linliñɔnte nico atiritu gonogu. ¹¹ Ma eeti ci uuwak, abon uuwak zɔɔz

o Joowo juruŋ. Maje eeti ci atirit gɔnɔgi, abon atirit niini nɔɔgo dɔyize o anyek Jooi nɔɔno dook. Utuguz nɔko ka katanaazo ɔl Jook kaale dook ŋaaten Yesu Kiristo o anyak titinyɔn been dɔyiz nɔko been neen. Nɔɔno neen.

Arɔɔŋ Jooi ɔl ogin kinimit pɔryakzet gole onin

¹² Lanɔtigan o kareezuŋ, má anyeku keteede biyeta kaale ci ger acinanuŋ igeet noko. Bar abon agawanu niiga nɔɔgo, eeci kaal nici ŋedet avunakuŋ igeet. ¹³ Bar zin atalto giye o ozoltu niiga ki Kiristo pɔryakzet onin, ka buk atalto tiŋeere iitene ci ayelzan niini titinyonte onin e. ¹⁴ Má amomozuŋ ɔl giye o eeginu niiga nuyak ci Kiristo, atalto labak, eeci gi nici ayelza gi o aave Vɔŋizi o Joowo adiŋdiŋ ŋaatunooŋ. ¹⁵ Alaŋ agano ŋaati ajowanu niiga pɔryakzet giye ci aruku ɔl kadaayito, karabɔŋ agorzinu, karabɔŋ amonyu ɔl, karabɔŋ aŋozoneku zozok culu. ¹⁶ Bar má apirnanu giye o anuyu niiga Yesu, má anyaku alyaan been neen. Bar anycek Jook zany ka kagaac ɔl niiga anuyu Yesu didi.

¹⁷ Inoko zin nici iiten ci acinanet Jooi ageet o katuwe kaale o apirnanet. Mazi yo má akanai pɔryakzet ɔɔwa ŋaatinai o, ma tiŋeere ole o alaŋ atuwe abil ku? Bar kane gerze tiŋeere ɔɔɔt ŋaatineeŋ. ¹⁸ Azi warage o Joowo ne, “Yo má aboca ɔl o abon loota ŋina, ma eela Jooi nɔɔgo ŋaati miliny ter o, mazin bar katin abil ku ole o oŋenu alaŋ atuwe?” ¹⁹ Mazin ɔl o apirna eo arɔɔŋi Jooi, abon niigi amena agɔɔn kaal o abon nɔko labak, ma abon anyek niigi eleeti ugeecik dook Jook baal eenyca nɔɔgo ka kozooti niini nɔɔgo ebaal aterkedeki e.

Liŋliŋɔn ci alaat o ɔl o tuwento

5 ¹ Inoko zin kilotuŋ igeet o eeginu alaat o ɔl o tuwento giye o keene buk naana alaan ci ɔl o tuwento kiyo niiga o. Ma buk keen bacoi o kicina pɔryakzet o Kiristo, ma kazola tiŋeere naana ki nɔɔno diŋdiŋɔn onin o ka keyelizyai. ² Kilalekuŋ igeet ka otowaac ɔl o tuwento anyuŋ Jooi igeet uzuuti. Uzuuti nɔɔgo juruŋ zinzeetine ugoocok dook eo arɔɔŋi Jooi calaŋ bar adaŋoneku. Má aliŋliŋnyu liŋliŋɔn nico giye ci ka ojoktai kaal, bar iliŋliŋit giye o arooŋnyu niiga itiriti nɔɔgo zinzeetine ugooc doon. ³ Má anyeku eleeti iziti alaat ole o anyonekuŋ igeet ka abalit, bar abon arayinu niiga nɔɔgo gole ci abon ka buk niigi kayayiztuŋ igeet. ⁴ Tiŋeere ma abada alaani o towawiinto, ŋaan aku aborcekuŋ niini igeet kondenen o alaazetu o alaŋ adicai been neen.

Arɔɔŋ Jooi ɔl ogin dook kecelbezanit eleeti

⁵ Zin buk niiga lɔgɔzet abon aŋolinu ɔl o mayan ŋaatunooŋ. Abon niiga acelbezanu eleeti, ma atiritonu niiga dook. Eeci azi warage o Joowo ne, “Abor Jooi ɔl o adɔŋ eleeti, maje bar ɔl o acelbezanit eleeti anyek nɔɔgo deten.” ⁶ Zin giye nico ecelbezanit eleeti, ariyek niiga eleeti aziit o Joowo adɔi ka kodoŋuŋ niini igeet ki taden iitene o arek niini. ⁷ Anycek kaalyan ugooc iionu dook Jook, eeci niini azuunuŋ igeet.

⁸ Egenyit zin! Ebeyit eleeti juruŋ, eeci Loryen ween miroi unooŋ aruur azɔp looc kiyo maa o arɔɔŋ eet o adak o. ⁹ Iicirtɔ ki Loryen. Odooyit tuwente unooŋ, eeci agayu niiga ɔl o atuwe loocowe dook apirna buk nɔko.

¹⁰ Bar zin Jooi o anyuŋ igeet deten kaale dook ŋaan atirituŋ niini igeet pɔryakzete nico dook, ma anyuŋ igeet uruktek zɔɔ looc odooyit. Nɔɔno neen baal awanet ageet ka kivita kozolit ki nɔɔno titinyɔn onin abil been neen ŋaaten Yesu Kiristo e. ¹¹ Abon abil dɔyizi o alaazet onin nɔko kodot. Nɔɔno neen.

Zɔɔz o Pitor aŋorneke

¹² Kayeedekuŋ warage nico igeet ŋaati atiritan Silas. Niini gɔtɔna o abon tuwento. Kayeedekuŋ zin igeet warage ci kutur noko ka kidiziyeyuŋ, ma buk kayelekuŋ igeet gɔl o Joowo een didi ka zin ojokta niiga deten o Joowo adikir. Abon zin niiga anuyu gɔl nico nɔko.

¹³ Azaayuŋ zin igeet gotonogu o tuwento aŋera Jooi Babilana ŋaato. Buk ŋeeran o tuwento kazi Marko azaayuŋ. ¹⁴ Azaayo buk zin gɔɔn niiga dook reezɔnta.

Abon bai abilna ganɔni o Joowo ŋaatunooŋ dook o atuyu Kiristo. Nɔɔno neen.